

Bohlwg Dangjyenz

□ Banh Singhhaij / 潘星海

Cunghan Siujveiz ciucomz gyoengq dangjyenz haihoih, doxyaeng ngoenzseng aen dangj raeuz yaek guh maz saeh geiqniemh. Siujveiz naeuz ciengz fuengzhaed binghraq neix gaenq guh song bi lai lo, yienznaeuz fuengzhaed guhndaej habdangq mij ok maz saeh, hoeng gij binghraq bwtbingh sinhgvanh caengz cied, danghnaeuz seizneix mbouj singsak, saeklaeuq hawj binghraq dauq fat, couh dangq ninz daengz mbwnrongh cij doek congz lo. De ciudaeuz youq ngoenzseng aen dangj raeuz gyoengq dangjyenz vih ndaw mbanj fuengzhaed binghraq guh saehndei. Caezgya dingq le cungj yaengxfwngz haenh naeuz yienghneix guh baenz lo.

Ciengz binghraq neix song bi gaxgonq sawqmwh daeuj seiz, mbouj miz vunz liuh daengz baenzneix youq-gaenj, haujlai vunz cungj nyinhnaeuz song sam ndwen couh gvaqbae lo. Goeng cungdungj Meijgoz Dwzlangj-buj gangj ngaih dangq bok naengbiek, de naeuz gaej yungh feiq goengfou bae fuengzraq, gij binghraq neix gig vaiq couh gag cied lo. Doeklaeng, haih gyoengq Meijgoz dai bak geij fanh vunz, gij binghraq youq Meijgoz yied cienzlah yied gaenjyiuq, mbouj rox baezlaeng vanzlij dai geijlai vunz cij daengx.

Siujveiz naeuz: “Mbouj beij mbouj rox byawz ndei byawz yak, mbat beij doq hawj vunz yawj cingcu dangqmaz. Dwzlangj-buj laepda haibak doeng gangj sae mboen, guh mbouj baenz saeh najndaem laih Cunghgoz

raeuz, nyinhnaeuz vunz seiqgyaiq cungj bienq ngawz liux lo. Seizneix hawj vunz seiqgyaiq cungj yawj cingcu, vanzlij dwg Dangjuncunghyangh raeuz dazyinx ak, ciengz fuengzhaed binghraq neix gig vaiq couh gaem-haed, mij ok maz saehyak hung. Gij saeh gyae haenx raeuz mbouj gangj gonq, caezgya yawj aen mbanj raeuz, caenhgonq guh ndaej hix mbouj loek……”

“Gaej gag haenh bonjfaenh lo, mwngz naj na lai dwg lwi?” Laujveiz faek Siujveiz naeuz. “Gyoengq cunghan guh maz, vunz ndawmbanj lwgda ronghsagsag, lau gyoengq beixnuengx mbouj rox ma?”

Siujveiz dacaengz Laujveiz naeuz: “Gou gangj gijneix dwg goenglaux caezgya, yienghneix gangj loek ba?”

Laujveiz naeuz: “Mwngz ngamq gangj daengz Dangjuncunghyangh, doq cieq gangj mbanj raeuz guh ndaej baenzlawz ndei, hawj vunz nyinhnaeuz mwngz yaek caeueq Dangjuncunghyangh bingzbaiz……”

“Caengz gwn laeuj couh fiz lo, haibak luenh ndau……” Siujveiz doiq Laujveiz mbwnjbak mboenbyoed-byoed. De gangj vah sing saeq, nyinhnaeuz Laujveiz rwz miz di nuk dingq mbouj ndaej nyi. Byawz rox, Laujveiz bingzseiz rwz nuk, haihoih seiz beij byawz cungj rwzraeh. De fok Siujveiz: “Danghnaeuz haihoih mbouj hawj vunz gangj vah, maz saeh mwngz gag dingh ndaej lo, heuh caezgya daeuj haihoih guh maz ne?” Siujveiz dingq goenglaux baenzneix gangj, naj

hoengzfwgfwg mbouj gamj ok sing.

Song bohlwg neix cungj dwg dangjyenz, vunzmbanj heuh songde guh dangjyenz bohlwg. Gaxgonq Laujveiz guh cunghan, laux le daengz bi duiyoh, vunz lai hawj lwg de Siujveiz cieqban. Laujveiz doiq Siujveiz gig yiemz, maz saeh yawj mbouj gvaq da couh dangciengz naeuz, mizseiz vanzlij fatheiq fok, mbouj hawj naj louzcingz saekdi. Mizmbangj saeh Laujveiz guh ndaej gvaqmauh, Siujveiz hix mbouj fug, hoeng mbouj gamj youq dangqnaej vunz lai caeueq daxboh doxceng. Gaxgonq daxboh lienzdaemh guh ngeihcib geij bi cunghan, vih gyoengq beixnuengx guh haujlai saehndei, youq ndaw mbanj mingzmuengh gig daih, caeueq goenglaux doxceng vunzmbanj couh naeuz de mbouj gingqnaek banlaux.

Laujveiz doiq Siujveiz yiemz-haenq, mbouj dwg heuq singq gai laux hengzvang. Caenhgonq, Siujveiz guh geij bi cunghan le, raen vunz guh seng'eiq fatcaiz simhumz, doiswz mbouj guh cunghan, ciq ngaenz bae guh seng'eiq, de baenzlawz gieng naeuz cungj mbouj dingq. Danghnaeuz seng'eiq guh ndaej baenz mbouj youqgaenj, hoeng luet ek mbouj guh cunghan, guh seng'eiq caiq caembonj, hawj vunz riu naeuz uengjfeiq ciengz goengfou ndeu liuh mbouj daengz song gyauej cungj hoengqvat, Laujveiz hujhaemz mbouj dai. Gvaqlaeng gyoengq dangjyenz daez genyi hawj Siujveiz dauqma guh cunghan, Laujveiz naeuz doengh lwg bingdeuz neix

mbouj haicawz gij dangjiciz de cungj ndei lo, de baenzlawz lij miz naj dauq guh cunghan ne? Gyoengq dangjyenz menhmenh gieng naeuz de, hauxseng uk mbaeu haengj sawq guh lai cungj hong, seizneix de gaenq rox gaxgonq guh mbouj deng, wnggai caiq hawj de gihvei gaij loek. Caiqnaeuz, hauxseng byaij roen doemjnduet le, baezlaeng guh saeh couh rox gag yunghsim re lo. Dingq gyoengq dangjyenz yienghneix gangj, Laujveiz congghoz gij heiq haemz cij siu di, swnh'wngq caezgya eiqnyienh. Daj Siujveiz dauqma guh cunghan hwnj, de doiq Siujveiz beij doenghbaez yiemzhaenq ndaej lai, bingzseiz raen Siujveiz guh maz saeh mbouj deng, couh bek daiz fok donq ndeu.

Caenhneix yen cwngfuj Cinz yencangj yaek roengz mbanj daeuj cazyawj fuengzhaed binghraq cingz-gvang, yangh cwngfuj heuh gak mbanj bwh ndei gonq, daengz seizde hawj yen lingjdauj yawj ngamjeiq. Siujveiz heuh gyoengq dangjyenz daiqdaez, dawz gak gya gak hoh naj ranz laeng ranz cingjeix ndei. Gijneix mbouj miz maz gangj, caezgya cungj ngaek gyauej naeuz ndei. Siujveiz caiq heuh gak gya gak hoh bakdou cungj venj faj baiz, gwnz baiz sij fuengzhaed binghraq byauhyij. Siujveiz vah caengz gangj liux, Laujveiz doq vadfwngz hemq dingz. Siujveiz naeuz: “Ranz gou daiqdaez guh, gou guh ndaej daengz, cij heuh caezgya gaen gou guh. Yienghneix miz maz mbouj deng ma?” (1)

Daengngoenz Baihdoeng Mbouj Rox Doek

——Cimh Riz Bak Bi Cunguek Gungcanjdangj

□ Cingh Swmungz / 清似蒙

Fanj “humx dwk” baez seiq,
Ndae Cuh Dwz okdaez,
Mboujguenj “bouxswix” naeuz,
Baengh geiqmaeuz bae hoenx.

“Bouxswix” naeuz ak lai,
Gag haenh gvai fouzbeij,
Raex geijlai dauhleix,
Cix gwnzeij damzbing.

Baengh Gungcanj Gozci,
Ciq fwjgyaemq dinmbwn,

Yienghyiengh ei duh vunz,
Bae cimh ndwn cimh naengh.

Aen mbwn caengz ronghndei,
Saek seiz lij fwn doek,
Raemxdah hwnj youh mboek,
Lij rox boek aen ruz.

Vangz Mingz diuz lohsienq,
Ndae bienq baenz godaeuz,
Mozswghoh roet haeu,
De hix naeuz gaiqbauj.

Laux Ciengj mbouj fug saw,
Gip hwnj gaw hwnj max,
Rumzyak bongjafa,
Roemx gvaq lueg gvaq ndoeng.

Fanj “humx dwk” baez haj,
Euq mbouj gvaq godaeuz,
Yawz naeuz couh yawz naeuz,
Youz de gangj liux suenq.

“Fanjdungbai dwk raeuz,
Bakdou yaek dingj maenh,

Gaej hawj vunzdig gaenh,
Bae haenq dangj haenq laengz”.

Lij Dwz caeueq Bozguj,
Guh gaem cijveihgenz,
Ciuqbuen fap Suhlenz,
Caenhrengz bae buekhoenx.

Vunz “baujleij canloz”,
Raeuz iet hoz bae dingj,
Cien fanh vunz vutmingh,
Seihaiz ringx rim bya.

(14)